



Siverth K. Heilmann

UPA 2022/77

Atassut

17. maj 2022

Qanoq iliorutta inuiaqatigiittut Naalagaaffiit Peqatigiit meeqqat pillugit isumaqatigiissutaanni nr. 2-mi allassimasoq ”Immikkoortitsisoqassanngilaq” nunatsinni atuutsissinnaavarput? Qanorlu meeqqat eqqugaasimasut inuiaqatigiinni akuutinneqartutut misigitissinnaavagut?

(Inatsisartuni ilaasortaq, Aqqalu C. Jerimiassen, Atassut)

Ajoraluartumik inoqatigut immikkoortittuarpagut. Allanik oqaaseqarpata, allatut isikkoqarpata, suminninganneernerallu pillugu. Atassummiit isumaqarpugut ingerlariaqqittariaqartugut, inunnillu isiginnittaaserput pitsanngorsarlugu.

Uanilu qisuariartariaqavissortutut misigivugut meeqqat pillugit immikkoortitsisarneq atugaasoq tusaamagatsigu. Pingaartumillu meeqqat sakkortoerujussuarnik misigisaqarsimasut, ulloq unnuarlu angerlarsimaffinnut inissinneqartariaqartut, inuiaqatigiinniit ajattugaasarsimmata.

Meeraanitsinni meeqqat uersagaanerarlugit sakkortuumik pineqartarnikut ullutsinni akuersaarsinnaanngilluinnarparput, aamma akuersaagassanngilaq. Taakkumi meerannguit meeraqatiminniit ajattugaanertik innarligaassutigisarmatigit. Ajoraluartumilli piviusoq tassaavoq ullumikkut taakku meerannguit inuiaqatigiinni inersimasuniit ajattugaajuarmata.

Ulloq unnuarlu angerlarsimaffiit pingaartittuartaarpat meeraq sakkortuumik aqquusaagaqarnikoq toqqissisimanartumik asimiitinneqarsinnaanissaa, pinngortitarsuarmi, ileqqugut malillugit pilisarnikkullu akuutillugu. Taamaattorli illuaraqarfinni saniliisa taakku meerannguit naammagittaalluutigiuarparpat, allaallu ulloq unnuarlu angerlarsimaffiit illuaraliornissaminut itigartitaassutigisarparpat, taakku meeqqat sumiiffimmi saniliusussaniit narrugineqaramik.

Qanormiuna iliorluta inoqatigut immikkoortikkunnaassavagut? Pingaartumillu meerannguit? Eqqarsartaatsisigut allannguinnikkut, akuutitsinerulernikkut, ammasumik eqqartuinikkut, inoqatitsinnik ammut isiginnikkunnaarnikkut. Qanormi maanngaanniit iliorsinnaavugut? Qulakkeerinneqataasinnaavugummi FN-ip isumaqatigiissutaanut immikkoortitsinnginnissaq ilumut maani nunatsinni atuutsitsinerluta.

Inoqatigut ataqqitigit, akueritigit. Tamattami inissaqarpugut.